

# Ün proget «incunvenziunal simpel» pella scoula da Scuol

**Il cumün da Scuol ha preschantà ils differents progets entrats pro la concurrenza d'architectura per refar l'areal da scoula a Quadras. Desch progets d'iran admiss pella concurrenza, persvas a la giuria ha quel cul nom «Flurina e Mauro» d'ün collectiv d'architectas ed architects giuvs da Turich.**

«Important ans d'eira d'ameglrar l'ütillizaziun e l'access da l'areal», declera l'architect Gabriel Merkli. El es part dal collectiv d'architectas ed architects giuvs da Turich chi ha pella prüma jada guadagnà üna concurrenza d'architectura e chi fabricarà a Scuol sia prüma scoula.

Cun lur proget «Flurina e Mauro» vain fabricchà süin l'areal da Quadras ün nouv edifiz pellas scoulinas, ün pel s-chalin ot ed üna garascha suotterrana. «Nus lain dar a mincha s-chalin da scoula ün agen sector e deliberar l'areal uschè bain sco pussibel dal trafic motorisà», disch l'architect. «L'entrada a la garascha ed ils parcadis per giasts vaina perquai spostà a l'ur da l'areal.»

Il capo cumünal Aita Zanetti, chi d'eira eir part da la giuria, disch cha'l proget «Flurina e Mauro» haja accumulì il megler las pretaisas fattas ed haja gnü ün bun rebomb eir pro las persunas d'instrucziun. «I darà üna piazza da scoula sainza autos e quai es ün grond guadogn», disch ella.

## Ün detreschamaint da l'areal

Actualmaing serva la piazza da scoula eir sco piazza dal parcar e l'areal vain occupà eir da l'administraziun cumünala intant cha las scoulinas e las structures dal di sun drizzadas aint ourdvar. Quella situaziun vuol il cumün müdar, far ün uschedit detreschamaint. «L'areal Quadras dess in futur esser reservà pella scolaziun», disch Aita Zanetti.

Primarmaing vaja però eir per quai da s-chaffir daplü pels uffants e pellas persunas d'instrucziun: Actualmaing sun las stanzas dal s-chalin ot straplainas, pellas persunas d'instrucziun manca il lö per as preparar ed ils uffants ston per part ir l'is corridors per far lavurs individualas o da gruppas. «Quai nun es üna situaziun chi cuntainta», disch Aita Zanetti. «E tuot tenor svilup demo-



Visualisaziun dal nouv edifiz pel s-chalin ot a dretta da la chasa da scoula existenta.

fotografias: mad



Sguard i'l local d'inscunter da la nouva scoulina.

grafic vaina eir massa pac lö illas scoulinas.»

## Duos edifizs nouns cun blier lain

Cul proget «Flurina e Mauro» vain fabricchà ün nouv edifiz per trais scouli-

nas ed üna stanza pella struttura dal di al nord da l'areal, là ingio chi's rechatta intant amo la chasa Central chi dà intant tanter oter tet a l'uffizi da fabrica ed a l'Energia Engiadina. Guardond da là vers süd, da tschella vart da la piazza

da scoula e tanter la chasa cumünala e la chasa da scoula existenta, vain fabricchà ün edifiz cun quatter plans pel s-chalin ot. L'entrada a la garascha suotterrana vain fabricchada a l'ur süd-vest da l'areal, suot la chasa cumünala.

Sco «incunvenziunal simpel» ha l'architect Gian Carlo Bosch descritt il proget «Flurina e Mauro». El ha accumpagnà il cumün d'ürant il svilup dal concept e d'eira sco expert eir part da la giuria. «Id es ün proget tuottafat professional», disch el. «Eu nu vess mai pensà ch'el deriva d'ün collectiv giuven.»

## Proceder da valütaziun anonim

D'ürant la valütaziun dals differents progets d'iran quels anonimisats, la giuria es pür davo la premiaziun gnüda a savair chi chi ha dat aint che proget. «Il collectiv respunsabel pel proget «Flurina e Mauro» applichescha principis tradiziunals e structures chi s'han cumprovadas. Quellas hana però interpretà cun simplas masüras in ün möd modern e creativ», desciva Gian Carlo Bosch il proget. «Simpel, ma na banal.»

Ils edifizs nouns sun dominats da lain. «Uschè blier beton e fier sco chi fa dabsögn, uschè blier lain sco pussibel», desciva l'architect Gabriel Merkli l'idea. Ch'els s'allegran ferm da realisar uossa lur proget insemel cul cumün e ch'els sajan motivats da fabricar üna bella scoulina ed üna bella scoula pels uffants e pellas persunas d'instrucziun.

## Prüm pass per revisiun complessiva

Uossa cha'l cumün ha preschantà il proget victur e tschels desch a la populaziun gnia tut per mans la planisaziun concreta, disch Aita Zanetti. «Là esa da verer cha'l proget es cumpatibel cun l'andamaint da scoula e da l'administraziun.» Cha'l böt saja da finir quella planisaziun amo quist on. «Lura pudaina dumandar a la populaziun per ün credit complessiv», disch il capo cumünal.

La realisaziun dal proget «Flurina e Mauro» es il prüm pass d'üna revisiun complessiva da l'areal Quadras e dess custair var 20 milliuns francs. In ün seguond pass sto lura eir gnir tutta per mans la renovaziun da la chasa da scoula existenta e da la chasa cumünala. Totalmaing fa il cumün quint cun cuosts da var 35 milliuns francs. «Nus stain realisar pass per pass», disch il capo cumünal. Ed agiundscha lura cha our da la perspectiva da la supranza cumünala nu's tratta d'ün proget da centralisaziun pellas fracziuns da Scuol. Cha'l böt principal saja da s-chaffir daplü lö pellas scolares e pels scolares e pellas magistas e pels magistas a Scuol.

Michael Steiner/fmr



Il collectiv d'architectas ed architects ch'ìd ha guadagnà la concurrenza: (da schnestra) Sindusan Balasingam, Gabriel Merkli, Michael Riker, Florence Gilbert e Cyril Kunz. L'exposiziun dals progets illa sala cumünala da Scuol ha svaglià grond interess.

fotografias: Michael Steiner

